



Kgang e, e ka ga setaki se se tumileng sa mosadi
wa montsho mo Aforikaborwa Mmakgabo Helen
Sebidi.

O belegetswe kwa Marapyane, bangwe ba go bitsa
Skilpadfontein.

O tlaabo o sa ithuta sepe ka botaki jwa
Aforikaborwa fa o sa ithuta ka ga Mmakgabo Helen
Sebidi.



Fa Mmakgabo Sebidi a ntse a gola, Nkokoagwe Metato o ne
a mo ruta go dila le go kgapa mo fatshe le mabotana ka
boloko.

Gape o mo rutile go roka, go kgabisa le go fololela dibaga,
go bopa le go kgabisa dinkgo.




Mmakgabo Helen Sebidi o ne a tswa mo lelapeng le le tlhokang.

Se, se ne sa mo gapeletsa go ya go dira kwa Johannesburg kwa dikhitšing a le dingwaga di le 16.



Ka letsatsi lengwe o ne a kgatlhiwa ke mong wa gagwe a taka. O ne a rekela Mmakgabo dipente tsa gagwe tsa ntlha tsa oli.

Mmakgabo o ne a ikatisa ka nosi mo sephiring. Mong wa gagwe o ne a gakgamatswa ke talente ya gagwe, mme a mo rotloetsa go ithutela botaki.



Mmakgabo Helen Sebidi o ne a lemoga fa a tlhoka go ithutela botaki semmuso.


Ka ngwaga wa 1970 go ya go 1973, Mmakgabo o ne a ikwadisa kwa *White Studio* kwa Sophiatown.

O ne a katisiwa ke motaki wa montsho yo o tumileng e bong Keonakeefe Mohl.




Mmakgabo o ne a rata go taka ditiragalo tsa kwa
Marapyane kwa a goletseng teng.

O ne a taka basadi ba tswa komeng kgotsa ba tlhagola kwa
masimong.



Mmakgabo o ne a kopana le setaki Bill Ainslie yo o neng a mo rotloetsa go taka ka boitlhamedi.

Botaki jo, bo ne bo farologana le dikgang tsa mannete tse a neng a tlwaetse go di taka tsa botshelo jwa Marapyane.



Mmakgabo Helen Sebidi o ne a ruta bana botaki kwa
Katlehong Arts Centre.

O ne a nna leloko la *Art Foundation* mme a katisa bataki ba
basweu le ba bantsho mmogo.

Ka nako e, o ne a tshwara dipontsho tsa botaki kwa Zoo
Lake mme a rekisetsa bajanala tiro ya gagwe.



Botaki jwa ga Mmakkabo bo tlhotlhelediwa gape ke tshotlego ya basadi le ditiragalo tsa ka metlha kwa makeiseneng.

Tshotlego ka ntlha ya tlhaolele e itshupa sentle mo botaking jwa gagwe mo ditshwantshong tse: *Tear of Africa and Where is My Home?*



Mmakgabo Helen Sebidi o ne a tshwara dipontsho tsa gagwe tsa ntlha ka 1986.

O ne a bontsha boitlhamedi jo bo nang le bonnête.



Mme Sebidi o ne a fiwa sekolašipi sa *Fulbright* ke ba *American Embassy*. Mo, o ne a oketsa bokgoni jwa gagwe jwa botaki.

Tiro ya ga Mme Sebidi e itsiwe mo Aforikaborwa, Yuropa, Engelane le Amerika.



Tiro ya gagwe e mo dikalaring le dimusiamong lefatshe ka bophara. O ne a na le tlhotlheletso e bile a tlotliwa.

Mmakgabo o ne a abelwa sekgele sa *President Order* ka ntlha ya botaki ba pono le botaki ba setso le didiriswa.



Sebidi o supile fa go se thata go nna se o batlang go nna
sona.

Go reetsa nkokoagwe go ne ga mo tswela mosola thata!



—Dipotso

1. Ke ditiro dife tse nkokoagwe a neng a mo ruta tsona fa a santse a gola?
2. O ne a le dingwaga di le kae fa a simolola go dira?
3. Go tlie jang gore Mmakgabo e nne motaki?
4. Goreng a ne a atlega mo botaking jwa gagwe?
5. Ke eng se o se ratang ka ga Mme Sebidi?
6. A o dumela gore 'o ka kgona go nna se o batlang go nna sone? Tlhalosa karabo ya gago.
7. Batla tshedimosetso ka bataki bangwe ba le batlhano ba ba tumileng mo lefatsheng.
8. A botaki bo botlhokwa? Tlhalosa karabo ya gago.



Bukana e tlhamilwe le go kwadiwa ka Setswana
jaaka karolo ya didiriswa tsa go buisa tsa Zenex
Ulwazi Lwethu ka 2021.